


L'Autra mesa pert de Guido Anton Muss

Le é ancuntà n angiul che me à smilà, bussà sul fruent y suflà ite cun lesirèza n fla mpulsènt: l à inuem Guido Anton Muss. Nsci scumència la prejentazion dla mostra fata dala esperta de storia dl'ert, la dutora Danila Serafini

Coche l ie bele unì dit te plu ucajions nen'iel Museum Ladin nia mé n zènter per l'identità culturela dla valedes ladines, mancen luech ulache l vën pità cultura fajan cunzer, metan a jì referac, publican libri y fajan mostres. Chèst ann iel bele unì fat doi mostres, una n cunlaurazion cun l'Union Generela di Ladins, n'otra n cunlaurazion cun l EPL y a scumencé dai 30 de agost saràl per doi mënc na mostra sun l artist cunesciù Guido Anton Muss.

De jené dl 2001 à la Provinzia Autonoma de Bulsan cumprà ju 112 lëures realisei da Muss ti ani danter l 1968 y l 1999. I lëures ie dut sculptures n gran pert de bront y lën, mance vel'una de ghips. 24 de chisc lëures ie unic crisc ora per na esposizion organiseda dal Museum Ladin Ciastel de Tor cun l titul "L'otra mesa pert de Guido Anton Muss", ntenduda sciche mesa pert feminina, dal mumënt che l artist lëura dantaldut cun la tematica dl'ëila. „L corp feminil tla sculptures de Guido Anton Muss,“ dij la dutora Serafini, „devènta nce l luech dla variazion tematica: da alegoria dl tēmp o dla virtù a iconografies religëuses, da recuremēt tlassich tla cariatides a union cun la natura nchin a sēurantō n cialé ora belau zoomorf. L'ëiles ie suvènz ududes da danite, les se mostra te balanz y plëines de calma; les ne fej degun muvimeēt, les ie espressives y si mus ie essenziel, zēnza deguna defurmazion.”



Lëur dl artist de Gherdëina.

Nucajion dla mostra iel nce unì fat n catalogh cun i lëures metui ora tla mostra y leprò se à mo l Museum Ladin cruzià de lascé fé n film de 10 menuc sun l artist Muss.

A Guido Anton Muss ti vëniel perchël dedicà tl self dl Museum Ladin na mostra te na maniera cumpleta y durerà dai 30 de agost nchin ai 31 de utober 2002. I orares de giaurida sarà i medemi di orares dl museum. Pra la giaurida, che unirà fata coche dit ai 30 de agost dala 6 da sēira, saràl prejent nce l presidēt dl Guviern Provinziel dr. Luis Durnwalder, l assessëur per la Cultura tudëscia y i museums dr. Bruno Hosp y l assessëur per la Cultura Ladina dr. Florian Mussner.

Usc di Ladins, 24.08.2002